

Poesia di Nino Cirrito

LASCARI BEDDA MIA

1

Se taliava du munti o da marina
parevi na sirena addurmintata
ca cura stinnicchiata pi pinnina
e i pinni cu la testa pi muntata;
Sutta-Laschiri chinu di iardina
vigni: Chiusa, Bauri, Santa Caterina.

2

A San Giuseppi c'erinu lumuna
A Sienia e Cudduzzu pira sulu,
a Chiana cuttuni, pipi, muluna;
o Munti s'acchianava cu lu mulu.
Tranu, Alivazza c'eranu carrubbi
Rapputi dava a manna chi so dubbi.

3

O Lanniru, Lintini, e Farinedda,
Puzzetti, San Vastianu, Santu Conu,
i beddi alivi davinu a minnedda
uogliu, passuluna, e vinu bonu
cu Cumienna, Ammaculata, Cuvaria
Vuschittu, Giacumettu, Santa Fumia.

4

Se tu scinnievi versu a lu Stazzuni
o iavi a lu puonti pi Grattieri
c'era la fabbrica di lu sapuni
u sansificiu'a curva Cavalieri.
C'erani i carcari da quacina
ca cucievinu a pietra calcarina.

5

Mentri Laschiri criscieva pianu pianu
e 'nte urbi rignava la malaria,
pi spagliari li favi e puru u granu
annu sciglieru lu Chianu di l'Aria?
Annè oggi a funtana chistu stava
pirchè c'era lu ventu chi sciusciava.

6

E mentre travagliavinu sudanti
cu lu sulì ca iava a lu miriu,
priavanu a Madonna e puru i Santi
nun si scurdannu di ludari Diu,
mentr'i muli truttavinu d'intuornu

accussì gridavinu tutt' u iurnu.

7

“Unnavi a passari sta iurnata senza salutari a Matri Addulurata”

“E LudamiLa di ogni banna, viva Maria di Gibulimanna”

“San Giuseppi nun'abbannunati 'nte bisogni e li necessitati”

“E LudamiLu sempri o spissu, viva Gesù Crucifissu.”

E lu tempu suvranu iav' avanti
e tutti facievinu i benestanti.

8

Uoggi i nostri tempi sunnu cangiati
un si va cchiù 'ncampagna pi campari:
i tierri quasi tutti abbannunati
e a gienti cerc' u puostu di pigliari;
'ncurpa a lu guviernu e cu cumanna
e aspietta ca du cielu cari a manna.

9

Nuautri figli di stu gran passatu,
ca i nostri patri ficiru la guerra
pi fari di l'Italia un sulu Statu
e tanti d'iddi n'arristaru 'ntierra,
difinniemu cui denti stu paisi
travagliamu tutti ad allargat'intisi.

10

Nun ni scuntramu tantu pi parrari,
nun siervi, circamu a fratellanza,
ognunu di nuautri av' a pinsari
'nca nta sta vita sulu l'alleanza
duna benessere e porta buoni frutti,
pinsari ben'e rispittare a tutti.

11

Basta cu li scuontri deludenti,
basta essiri sempri 'nta dui canti
fari accusì nun porta propriu a nienti
aviemu a star'in paci e iri avanti.
E priamiLu 'nsiemmula a na vuci
VIVA PI SEMPRI GESU' CRISTU IN CRUCI.

Lascari, 3/5 agosto 2013